

BATAKURU PUULUSA HAA E BE GALAASI BEN

¹ Immorde e an min Puulusa, oo *sahaabaajo, mo tawata hinaa yimbe ben toddii dfun, hinaa kadi e hay gooto dun rewi si hinaa e Iisaa Almasiihu on e Alla Baabaajo on, on Immintindo mo e hakkunde maybe ben, ² wondude e musibbe be mi wondi ben fow, haa e mon onon ngal *moftal Iisaa wongal Galaasi.

³ Yo moyyere e buttu wonan on immorde e Alla Baaba men, e Iisaa Almasiihu Joomi on, ⁴ on ittuso hoore mun sadaka fii junuubaaji men dfin fii dandugol en e nguu jamaanu bonngu fewndiingu hande, wano Alla Baaba men hoddiri non, ⁵ on mo mangural wonani haa poomaa. Aamiina!

Fii Kibaaru Moyyo Bajjo on

⁶ Mido njaldi fii koo ko yaawudon yiltaade e baawo oo Noddirdo on moyyere Iisaa Almasiihu on, haa ka yahanon kibaaru goo. ⁷ Hara-le kibaaru goo alaa, kono yimbe goo no woodi wonbe on jiibude, faalaabe boylude *Linjiila Almasiihu on. ⁸ Kono hay si ko menen maa malaa'ikaajo iwrudo ka kammu fejjinani on kibaaru goo sertudo e oya kibaaru mo men fejjinannoo on, yo o malkise. ⁹ Hari men yeetinoke on dfun ado hande, mido fillitaade

a ^{1:7} 1.7 Dun ko Kibaaru Moyyo on.

kadi: si godđo fejjinanii on kibaaru sertudo e oo mo hendinodson, yo o malkise.

10 E jooni non, hara ko teddungal yimbe ben mi woni dabbude, kaa ko iwrungal ka Alla ngal? Kaa hara mido dabbude no yimbe ben yidirammi? Si mi faalano haa jooni yo yimbe ben yidan, mi laatotanooko kurkaadu Almasiihu on.

Fii no Puulusa Fejjiniranaa Kibaaru Moyoon

11 Mi andinii on, yo musibbe an, oo Kibaaru mo mi fejjinani on hinaa iwrudo e nedfanke.

12 Ko fii min mi hebiraali mo nedfanke, awa kadi wonaa nedfo jannimmi mo, kono ko Iisaa Almasiihu on tigi fejjinanimmii mo.

13 On naniino fii dee kuude an e saa'iji goo wa fewndo ko mi woni ka diina *Yahuudiyanke, dfun ko fewndo ko mi cukkii moftal Alla ngal haa feyyiti, mido lanca. **14** E nder kan diina Yahuudiyanke, hari mido buri goreebe an buy e hakkunde lenol an ngol, ko fii hari mido buri be himme tiifuso fii aadaaji baabiraabe amen ben. **15** Kono, nde Allaahu on, on Subinoodo lan gila ka teege yumma an, dfun ko on Noddirdo lan moyyere mun nden, **16** o tawno no moyyi ka o fejjinanammi Bisdo makko on fii no mi weebitirana mo be wonaa Yahuudiyanke ben, laatii mi landaaki hay gooto. **17** Kono e hoore dun mi yaaraali kisan *Yerusalem fii yiidoygol e adiibe lan todseede ben, kono mi yaari ka leydi Aarabu. Bawto dfun mi yiltitii Damaasi.

18 Ko duubi tati bawto dfun si mi yahi Yerusalem fii yiidoygol e Petruusu. Mi woni ka

makko don e nder balde sappoo e jowi. ¹⁹ Kono hari d'un fow, mi yiidaali e sahaabaajo goo, si hinaa Yaaquuba, d'un ko mijnpiraawo Joomi on. ²⁰ E nder koo ko mi woni on windande d'un, e hino Alla no reeni, mi fena. ²¹ Bawto d'un mi yahi e nder dee leyde Sirii e Silisii. ²² Kono hari mofte Almasiihu wonde e diiwal Yahuuda d'en yi'aali lan. ²³ Be naniino tun no wi'ee wonde: Oo cukkinoodo be oya tuma, no waajaade e ngal gomfinal ngal o faalanoo lancude. ²⁴ Jooni hibe mantude Alla fii an.

2

Fii Pottal Sahaabaabe ben Yerusalaam

¹ Duubi sappoo e nay bawto d'un, mi yiltitii Yerusalaam, mi yiltodi e Barnabaasi e Tiituusa. ² Ko sabu fejjinaneede mi yiltitori ton. Mi holli be daaluyee Kibaaru Moyyo mo mi fejjinani be wonaa Yahuudiyanke ben on. Mi fejjinani d'un burbe teddude ben e nder gundoo, fii wota taw ko mi gollunoo kon e ko mi woni gollude kon ko meere. ³ Kono fii kala oo mo mi wondunoo ko mo lenol goo, d'un ko Tiituusa, oo *Gereekiyankoo, be wi'aano bee o *sunninee. ⁴ Kono waditiibe musibbe men no suucinoo lombii hakkunde amen fii tefugol anda fii hettaare wonannde en e Iisaa Almasiihu on e faale maccindingol en. ⁵ Kono men jabanaano be d'un hay nde wootere, men yankinanaaki be kadi, fii no goonga wondo e nder Kibaaru Moyyo on tabitira e mon.

⁶ Kono laatii, bee wa'uße wa si ko burbe teddude, ko be wonnoo woo ko seeda hitti e an, bay Allaahu on hinaa dambe ndaarata,

ben beydaano huunde e ko mi woni waajaade kon. ⁷ Kono be ndaari be tawi ko mi halfiniraa daaluyee Kibaaru Mooyo on ko fii be sunninaaka ben, d'un ko be wonaa Yahuudiyanke ben, wano Petruusu halfiniraa non Kibaaru Mooyo on fii sunninaabe ben, d'un ko Yahuudiyankeeben. ⁸ Ko fii ko on Alla huutordo Petruusu, wadi mo *sahaabaajo fii Yahuudiyankeeben, ko kanko kadi huutorimmi, wadimmi sahaabaajo fii be wonaa Yahuudiyanke ben. ⁹ Nde tawnoo Yaaquuba e Petruusu e Yuuhanna, jogoraabe wa tugaale dental ngal, fellitii fii moyyere nde mi yedaa nden, be tamindiri juude amen jaame den, min e Barnabaasi, fii nabidal amen, fii yo menen men yaaru ka be wonaa Yahuudiyanke ben, kambe be yaara ka Yahuudiyankeeben. ¹⁰ Be yamiri men kadi anditugol miskinbe ben, dun ko ko mi hebulanii wadugol.

Fii Yeddondiral hakkunde Puulusa e Petruusu

¹¹ Kono nde Petruusu arnoo Antyoosi-Sirii mi feli mo e kene, sabu tawde ko o felniido. ¹² Ko fii, ado yimbe be Yaaquuba immini goo arude, hari o naamiday e be wonaa Yahuudiyanke ben, kono bay ben arii, o takkitii, o wonti feere, sabu kulol ben Yahuudiyankeeben gomdinbe, catii e sunninelgol ben, ¹³ haa d'un woni sabu beya Yahuudiyankeeben nembi mo kanko Petruusu e ngal faasiqiyaagal, haa d'un poodori hay Barnabaasi, o tawti be e d'un.

¹⁴ Kono nde mi ndaarunoo, mi tawi be alaa yaarude no feewiri e no yaadiri e goonga Kibaaru Mooyo on. Onsay mi holli Petruusu e tawnde fow dundoo, mi wi'i mo: «Si

tawii an Yahuudiyankeejoo on, a wa'ii wa mo wonaa Yahuudiyanke, a iwtii noone Yahuudiyanke, haray ko honno waawirtaa doolirde be wonaa Yahuudiyanke'en jokkugol aadaaji Yahuudiyanke'en?»

¹⁵ Menen non, ko men jibinanne Yahuudiyanke, wonaa men be dsiya leyyi junuubankeeji, ¹⁶ kono men faamii wonde goddo jogortaake feewudo sabu doftagol Sariya on, kono ko sabu gomdfingol Iisaa Almasiihu on. Ko dun wadi si menen kadi men gomdfinii Iisaa Almasiihu on, fii yo men jogore feewube sabu gomdfinal ngal gomdfinden Iisaa Almasiihu on ngal, hara hinaa sabu doftagol Sariya on. Ko fii hay gooto jogortaake feewudo sabu doftagol Sariya on.

¹⁷ Si tawii, e nder ko dabbeten jogoreede feewube kon sabu humondiral e *Almasiihu on, haray bangii wonde enen kadi ko en junuubankeebe, taw si dun no firi wonde Almasiihu on no wonani junuubu? Oo'o! ¹⁸ Si mi wonii e mahitugol ko mi libunoo kon, haray min tigi mi hollii ko mi bondo. ¹⁹ E telen-ma Sariya on, ko mi maydo ka banje Sariya fii no mi wuuriwana Allaahu on. ²⁰ Jooni mi fempidaama e Almasiihu on. Hinaa min tigi wuuri jooni, kono ko Almasiihu on wuuri e an. Dan ngurndan dan mi wuuri jooni ka bandu, mido wuuriwana gomdfingol *Biddo Alla on, on Yidudo lan, itti hoore mun sadaka fii an. ²¹ Min mi bugitotaako moyyere Alla nden, ko fii si tawiino peewal ko Sariya heborta, harayno Almasiihu on ko meere maayani.

3*Fii Sariya e Gomdfinal*

¹ Ko onon yo be Galaasi njofoobe, ko hombo mbildori on nii, onon bee banginanaabe ko laabi poy fempegol Iisaa Almasiihu on? ² Jooni ko dundoo tun mi faalaa andude e mon: hara ko sabu wadugol ko Sariya on yamiri kon hebirdon Ruuhu Allaahu on, kaa ko gomdfingol ko hedifon kon? ³ E jaa ko nii njofidirdon? E on fuddor Ruuhu Allaahu on, gaynitoron jooni wakkilaare bandu? ⁴ E hara kon ko tampunodfon fow wonay meere? Mido tanyinii wonataa meere! ⁵ E hara oo Wondo wadufe dii kaawakeeji moyyi e hakkunde mon, dun ko on Yedudo on Ruuhu mun on, ko woni dii wadirde ko fii hidon wadufe ko Sariya on yamiri on kon, kaa ko fii hidon hedorde gomdfinal?

⁶ Ko fii no windii wonde: «Ibraahiima gomdfini Alla, ngal gomdfinal makko jogoranaa mo peewal.»^b ⁷ Awa faamee wonde, gomdfinbe ben ko fibbe Ibraahiima. ⁸ Awa kadi bindi din no wi'i wonde Alla jogitoroyay be wonaa Yahuudiyanke ben feewube sabu gomdfinal ngal, dun ko ka Allaahu on adii fenjinde Kibaaru Moyyo on e Ibraahiima don, o daali: «Leyyi din fow barkinte sabu maa.»^c ⁹ Ko dun wadii ben gomdfinbe barkindinte e Ibraahiima, on gomdfinnoodo.

¹⁰ Kala ben hoolorbe Sariya on, haray ko e nder kuddi be woni, ko fii no windii: «Kuddi no e hoore kala on mo tabitaali e huutorgol ko windii

^b **3:6** 3.6 Fuf. 15.6

^c **3:8** 3.8 Fuf. 12.3, 18.18, 22.18

kon fow ka nder deftere Sariya.»^d ¹¹ E hoore dfun, no laabi poy wonde hay gooto jogortaake feewudo sabu Sariya on yeeso Alla, ko fii no windii: «Feewudo on wuuiray gomfinal ngal.»^d ¹² Awa Sariya on hottaaki gomfinal. Ko fii no windii wonde: «Kala doftiido dee yamirooje, o wuuiray dee.»^e ¹³ Ko e nder ko kuddi ndin wontani *Almasiihu on fii men kon, o sotti en e ley kuddi Sariya on, ko fii no windii: «Kuddi wonanii kala on wengaado e leggal»,^f ¹⁴ d'un ko fii no barki Ibraahiima hewtira leyyi din fow sabu Iisaa Almasiihu on, e hara kadi en hendorto fodaari Ruuhu Allaahu on gomfinal ngal.

Fii Sariya on e Fodaari ndin

¹⁵ Musibbe, miso yettude misal e hoore men. Si goddo aru e wasiyaade, kala ko o wasiyii, hay gooto waawataa firtude fun maa beydita goddfun e hoore d'un. ¹⁶ Kono fodaariiji din ko e hoore Ibraahiima e jurriya mun on woni. Kanko Alla o wi'aali «jurriyaaji din», wa si tawii ko di buy, kono ko gooto o wi'i «jurriya maa on»,^g d'un-le ko Almasiihu on. ¹⁷ E hino ko mi woni wi'ude kon: Sariya ardo duubi teemedde nay e cappande tati gaanin *ahadi ndi Allaahu on wadfunoo ndin waawataa firtude maa mehindina ndin fodaari. ¹⁸ Ko fii si tawno ndondi ndin ko ka Sariya iwri, haray ndi fawaaki e fodaari. Kono ko sabu fodaari ndin Allaahu on yediri Ibraahiima ndin ndondi.

^d **3:10** 3.10 Yaj. 27.26 ^d **3:11** 3.11 Hab. 2.4 ^e **3:12** 3.12
Lew. 18.5 ^f **3:13** 3.13 Yaj. 21.23 ^g **3:16** 3.16 Fud. 12.7,
12.15, 24.7

¹⁹ Jooni ko sabu hondun addi Sariya on? Ko sabu geddi addi Sariya on, haa nde on jurriya fodaado ari. Ko malaa'ikaabe ben fejnini Sariya on, kono be rewi e hakkundeejo. ²⁰ Hakkundeejo non wonaa sengo wooto wonirta, Alla-le ko gooto. ²¹ Dun haray Sariya on ko liddiido fodaariiji Alla din? Kono hinaa non! Si tawii sariya on ko gasoowo wurnude addanoo, harayno peewal ngal ko e makko iwaynood. ²² Ko dun wadi si bindi din wi'i fow no sokaa e ley junuubi, fii no fodaari ndin yediree gomdinbe ben sabu ko be gomdini Iisaa Almasiihu on kon.

Fii Gomdin ngal e Ronugol Fodaariiji din

²³ Ado gomfinal ngal arude, hari hiden sokii e ley joge Sariya on, haa ngal gomfinal araynoonngal feepa. ²⁴ Hari Sariya on ko ngaynaako men fii ko ardoo en e Almasiihu on, fii no jogoreden feewubbe sabu gomfinal ngal. ²⁵ Bay ngal gomfinal arii, en alaa e ley kongol on ngaynaako han kadi.

²⁶ Ko fii on fow ko on bibbe Alla sabu gomfinal ngal gomfinalon Iisaa Almasiihu on ngal. ²⁷ Onon *lootaabe maande kisiyee e nder humondiral e Almasiihu on ben fow, on bornike Almasiihu on. ²⁸ Yahuudiyankeejoo maa *Gereekiyankeejoo, maa maccudo maa dimo, maa debbo maa gorko, alaa hande kadi. Ko fii on fow ko on gooto e nder humondiral mon e Iisaa Almasiihu on. ²⁹ Awa-le si tawii hidon humondiri e Almasiihu on, haray ko on jurriya Ibraahiima, ronoobe fodaari ndin.

4

¹ Ko mi woni wi'ude: fannin ronoowo on ko paykun, haray alaa fus ko o serti e maccudo. Fii kala ko kanko jeyi fow, ² haray hikun e ley kongol ne'oobe kun ben e fewjanoobe kun ben, haa e saa'i mo ben makkun happi on timma. ³ Enen kadi wano non, wa fewndo ko wonden faybe, hari ko en maccube diii mbawdiji adunayan-keeki. ⁴ Kono bay saa'i on hewtii, Allaahu on adduno Bidso makko on, on mo debbo jibini, jibinaado e ley Sariya on, ⁵ fii sottugol ben wonbe e ley Sariya on fii no jogoreden wa bibbe. ⁶ Bay ko en bibbe, Alla addii ka berde men Ruuhu Bidso makko on, d'un ko on Ruuhu wondo ewnaade «Abba» e maana Baaba. ⁷ Dun haray hinaa a maccudo hande kadi, kono ko a biddo. Si tawii-le ko a bidso, haray ko a ronoowo immorde e Alla.

Fii Annde Puulusa nden fii be Galaasi ben

⁸ Wa fewndo ko on andaa Alla, hari ko on maccube sanamuji di tawata wonaa godsun tigi e oo aduna. ⁹ Jooni non on andii Alla, e tentinii non jooni ko on be Alla andi, ko honno non yiltitordon e dii mbawdiji mehi lo'udsi? E hara on faalaa de maccindinanaade kadi? ¹⁰ Hidon hittina fii nalaade den e lebbi din e saa'iji din e duubi din. ¹¹ Mido huli fii mon, wota taw koo mi yanganii on ko meere.

¹² Musibbe an, wa'ee wa an min, ko fii min mido wa'i wa mon, yandi mi jeejii on! Ko fii on bonaaki e an. ¹³ Hidon maanditii ka aranun ko sabu nawnaare an mi hebiri feere fenjinangol on Kibaaru Moyyo on. ¹⁴ Hidon waawunoo

non ronkude teddingol lan maa bugitoo lan sabu nawu an ngun, kono on wadaali d'fun! Ka liddu dun, on tol nirno lan wa malaa'ikaajo Alla maa wa Iisaa Almasiihu on tigi. ¹⁵ Ko honto weltaare mon nden woni jooni? Ko fii mido seeditanaade on d'fundoo: si no gasaynood, on borayno gite mon den, wattanon mi. ¹⁶ Haray e nder ko mi yeetotoo on goonga kon, mi wonii gajno mon?

¹⁷ Awa himme mo be joganii on on hinaa moyyo, ko be faalaabe sortude on e amen, fii no tawtiron be. ¹⁸ No moyyi ka goddo heba himme moyyo saa'i woo, hara hinaa si mido hakkunde mon tun. ¹⁹ Faybe an, mido joganii on kadi muuseendi nata haa wa'on wa *Almasiihu on. ²⁰ Mido faalaa wondude e mon jooni, mi yewtira on noone goo, ko fii mido aanani on.

Fii Maccangaaku e Ndimankaaku

²¹ Andinee lan, onon bee faalaabe wonude e ley Sariya on, si on faamaali ko Sariya on wi'i kon. ²² Ko fii no windii, Ibraahiima no mari bibbe dido: goddo on ko mo kordo jibinani mo on, oya on ko mo dimo on jibinani mo on. ²³ Mo kordo on, ko jibiniraado faale bandu, kono mo debbo dimo on, ko jibiniraado fodaari ndin. ²⁴ Dun ko misal nii: rewbe ben disco, ko ahadiiji din didi, *ahadi goo ko ndi Fello *Sinaayi ndin, bibbe mayri ben ko maccube, d'un ko Haajirata. ²⁵ Ko ngon Fello Sinaayi wongo ka leydi Aarabu woni Haajirata, hingo wa'i wa saare Yerusalaam handeere nden, bay hinde e nder maccangaaku, kayre e bibbe mayre on. ²⁶ Kono saare Yerusalaam dow-dowre nden ko dimo on,

ko on woni yumma men Saarata. ²⁷ Ko fii no windii:

«Welto yo an mo jibintaa,
an mo jiidotaako!

Sowtu weltaare, ewnodaa,
dun ko an mo andaali muuseendi njata!

Ko fii ko bibbe on wulfaado
burata dhuudude edii on debbo wondudo e
moodi on.»^h

²⁸ Ko fii, yo musibbe, onon kadi ko on bibbe fodaari ndin, wano *Issaaqa non. ²⁹ Awa kadi, ko wano ko feyyunoo kon, on hebiranoodo faale bandu, bittinayno on hebiraadlo Ruuhu, ko dun fewndii kadi jooni. ³⁰ Ko hondun bindi din wi'i? Ko: «Rado kordso on e biddo mun on, ko fii biddo kordso on ronidataa e mo debbo dimo on jibini on.»ⁱ ³¹ Ko wano non yo musibbe, hinaa en bibbe kordso on, kono ko en be debbo dimo on.

5

Fii Ndimankaaku Men Sabu Almasiihu on

¹ Ko fii no woniren rindinaabe wadi si *Almasiihu on rindini en. Awa wonee tabitube, wota on yiltitu hoore mon kadi e ley boggol maccangaaku.

² Ko dun wadi, min Puulusa, mi wi'ay on wonde si on etike fii yo on sunnine, haray Almasiihu on nafataa on huunde. ³ Awa mi fellintinanay kala neddo kadi wonde si etike haa sunninaama, haray himo haani jokkude Sariya on fow. ⁴ Onon bee wonbe dabbude no jogitoree feewube ka Sariya, on seedii e Almasiihu

h **4:27** 4.27 Isa. 54.1 i **4:30** 4.30 Fud. 21.10

on, awa kadi on woddondirii e moyyere Alla nden. ⁵ Kono enen, tama'u men on ko jogoreede feewube yeeso Alla sabu gomdinal men ngal. Ko tippude e Ruuhu on sabbiden on tama'u. ⁶ Ko fii, ko hitti e wonbe e Iisaa Almasiihu on ben kon hinaa *sunninegol maa angal sunninegol, kono ko gomdinal feppiniroowal hoore mun giggol.

⁷ Ko fii hari hidson dogude moyya. Ko hombo non darni on haa hadi on doftagol goonga on?

⁸ Awa nden fewjoore dson hinaa e Noddudo on on iwri. ⁹ Ko fii lewen seeda tun yurinay farin jiibaado. ¹⁰ Min non mido joganii on ndee hoolaare doo e fee Joomiraado on wonde, on mijotaako godsfun goo. Kono on wondo jiibude on, dfun non ko wondo woo, o rondoyto naawoore nden. ¹¹ E min non yo musibbe, si mido waajaade fii nafa sunninegol, haray ko fii hondun kadi mi cukkantee? Si tawno haa jooni waaju an ngun no humii e sunninegol, haray fempeede Iisaa Almasiihu on ka hoore *leggal altindiraangal accii wonangol yimbe ben peggal.

¹² Yo ben wonbe sonjude on bujito haa daata!

Fii Wuurigol Ruuhu Allaahu on maa Mbeleede Bandu

¹³ Musibbe, jooni on noddaama ka ndimankaaku. Wota on baaror ngun ndimankaaku mon fii wadugol mbeleede bandu, kono kurkondiranee e nder giggol. ¹⁴ Ko fii Sariya on fow no timmi e nder aaya gooto, e hino mo: «Yo a yidsir nokondo maa on wano yidsirfaa hoore maa non.»^j ¹⁵ Kono si on njatindirii, on

seekindirii wa kulle d'en, awa reenee wota on mulindir.

¹⁶ Ko d'un si mi wi'ay on: wuuriree Ruuhu Allaahu on, d'un on jokkataa himmeeji bandu.

¹⁷ Ko fii himmeeji bandu no liddondiri e Ruuhu Allaahu on, on *Ruuhu Seniido kadi no liddondiri e himmeeji bandu, ko di lurrudi kanji didi, fii wota on wadu ko faaladon woo. ¹⁸ Kono si Ruuhu Seniido on ardiye on, haray hinaa e ley Sariya on wondon. ¹⁹ Ko fii mbeleede bandu d'en no waalii e kene, d'en-le ko jinaa e angal laabal e jiibaare ²⁰ e rewugol sanamu e mbileyaagal e ngayngu e yeddondiral e nawliigu e monee e haasidi e sendondiral e fedde-fedde ²¹ e ngananeendi e mandilugol e *fasaadu e ko nandi e mun. Mido hadfude on, wano mi hadfirnoo on non wonde, ben wuuriibe nii heboytaa gebal ka *laamu Alla.

²² Kono ko Ruuhu Allaahu on funtinta kon, ko giggol e weltaare e buttu e mujal e yurmeende e moyyuki e sella-findeyaagal ²³ e newaare e waawugol hoore mun. Sariya hadaali sifa din piiji. ²⁴ Wonbe e Iisaa Almasiiihu on ben fempii bandu mun ndun wondude e himmeeji mun e faaleeji mun. ²⁵ Si tawii ko Ruuhu Seniido on wuuriiden, haray yaaden kadi e Ruuhu on. ²⁶ Wota en wonu mawnintiniibe, maa bagondiren, maa nawlindiren.

6

Fii Tambondirgol, Huuwa ko Moyyi

¹ Musibbe, si goddo e mon aru e wadugol bonnere, haray onon, be Ruuhu on ardi ben,

wurtiree mo hakkil newiiki. Onon tigi reenodon, fii wota onon kadi on jarribe. ² Rondondiranee anndeeji mon din. Ko non timminirton Sariya *Almasiihu on. ³ On mo no sikki ko o godfun, hara-le hinaa o huunde, haray o daynitike kanko tigi. ⁴ Mo kala yo tasko kuude mun d'en tigi, o yi'anay hoore makko hara hinaa e beya, d'un o anday no o mantora, ⁵ ko fii mo kala no haani rondaade dongal mun ngal.

⁶ Yo on wonaado janneede daaluyee on sendodu kala piiji moyyi e wondo mo jannude on.

⁷ Wota on daynito, ko fii Alla yawitetaake, ko fii kala ko goddo sanki ko d'un o wa'ata. ⁸ Mo sankii mbeleede bandu wa'ay e mayru halakuyee, kono on sankudo faale Ruuhu on, o wa'ay e makko *ngurndan poomayankejan. ⁹ Wota en haabu wadugol ko moyyi, ko fii en wa'oyay e saa'i haanudo si maayu bernde hebaali en. ¹⁰ Ko d'un wadi, fewndo ka weebani en d'on, wadfanen yimbe ben fow ko moyyi, tentinii musibbe men ben ka gomdinal.

Rawnoode Batakuru Puulusa ndun

¹¹ On yi'ii ittiri bindi njani di mi windirani on jungo an ngon d'in. ¹² Kala ben faalaabe wadsude ko welata yimbe ben kon, be karhay on fii *sunninegol, hara ko fii tun wota be tampine sabu *leggal altindiraangal Almasiihu on. ¹³ Ko fii hay kambe sunninaabe ben tigi be jokkataa Sariya on, kono ko be faalirtee yo on sunnine, ko fii no be mantora e hoore mon. ¹⁴ Min non hinaa non! Ko fii mi mantortaa huunde si hinaa leggal altindiraangal Iisaa Almasiihu Joomi men

on. Sabu maggal aduna on maayii telen-ma an, min kadi mi maayii telen-ma aduna on. ¹⁵ Awa hinaa sunninelmaa angal sunninelmaa hitti, kono ko ko Alla heydintini en kon hitti. ¹⁶ Yo buttu e yurmeende wonan kala jokkudo ndee yamiroore, hay e *Isra'iila mo Alla. ¹⁷ Ka heddii doo, wota hay gooto tampinan, ko fii battaate Iisaa den no ka bandu an. ¹⁸ Yo moyyere Iisaa Almasiihu Joomi men on wonu e berde mon, yo musibbe. Aamiina!

**Version Pular Fuuta-Jallon
The New Testament in the Fouta-Jallon Pular
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6